



O'ZBEKISTON RESPUBLIKASI XALQ TA'LIMI VAZIRINING BUYRUG'I

Tuman (shahar) xalq ta'limi bo'limlari xodimlarining faoliyati samaradorligini baholash to'g'risida

O'zbekiston Respublikasi Prezidentining 2019-yil 5-sentabrdagi "Xalq ta'limi tizimiga boshqaruvning yangi tamoyillarini joriy etish chora-tadbirlari to'g'risida" PQ-3931-sonli hamda 2020-yil 6-noyabrdagi "Ta'lim-tarbiya tizimini yanada takomillashtirishga oid qo'shimcha chora-tadbirlar to'g'risida" PQ-4884-sonli qarorlari ijrosini ta'minlash maqsadida **buyuraman:**

1. Tuman (shahar) xalq ta'limi bo'limlari rahbar va xodimlarining faoliyati samaradorligini baholash me'zonlari (KPI) ilovaga muvofiq tasdiqlansin.

2. Quyidagilar belgilab qo'yilsin:

2021-yil mart oyidan boshlab barcha tuman (shahar) xalq ta'limi bo'limlari rahbar va xodimlari faoliyati tasdiqlangan baholash me'zonlari (KPI) asosida baholab borilsin;

tuman (shahar) xalq ta'limi bo'limlarining ilovada ko'rsatilgan lavozimlar bo'yicha faoliyat ko'rsatayotgan xodimlariga Xalq ta'limi xodimlarini rag'batlantirish jamg'armasi hisobidan belgilanadigan har oylik ustamalar ushbu baholash me'zonlari asosida amalga oshirilsin;

ushbu ustamalar tuman (shahar) xalq ta'limi bo'limi mudirlariga tegishliligi bo'yicha Qoraqalpog'iston Respublikasi xalq ta'limi vaziri, Toshkent shahar xalq ta'limi bosh boshqarmasi va viloyat xalq ta'limi boshqarmalari boshliqlarining, boshqa xodimlarga tegishli tuman (shahar) xalq ta'limi bo'limi mudirining buyrug'i asosida tomonidan belgilansin;

tuman (shahar) xalq ta'limi bo'limlaridagi tegishli lavozimlar bo'yicha bo'sh ish o'rinlarini yangi talablarga mos keladigan, yuqori malakali mutaxassislar bilan to'ldirish Xalq ta'limi vazirining 2020-yil 18-noyabrdagi 272-sonli buyrug'i bilan tasdiqlangan "O'zbekiston Respublikasi Xalq ta'limi vazirligi markaziy apparati, hududiy bo'linmalar, tizimdagi tashkilotlar va muassasalardagi vakant lavozimlarga ishga qabul qilish, xodimlarni boshqa lavozimga o'tkazishda tanlov asosida saralab olish tartibi" asosida amalga oshirilsin.

3. Qoraqalpog'iston Respublikasi xalq ta'limi vaziri, Toshkent shahar xalq ta'limi bosh boshqarmasi va viloyatlar xalq ta'limi boshqarmalari boshliqlari:

bir hafta muddatda tuman (shahar) xalq ta'limi bo'limlari rahbar va xodimlari amalga oshiradigan ishlardan kelib chiqib faoliyat samaradorligi me'zonlarini belgilasin hamda vazirlikning Hududlar boshqarmasiga taqdim etsin;

tuman (shahar) xalq ta'limi bo'limlari xodimlari faoliyatining ushbu baholash me'zonlari (KPI) asosida xolisona baholab borilishini qat'iy nazoratga olsin.

4. Tuman (shahar) xalq ta'limi bo'limlari mudirlariga xodimlar faoliyati samaradorligini baholash me'zonlariga rioya qilish va maqsadli ko'rsatkichlarni bajarish yuzasidan shaxsiy mas'uliyat yuklatilsin.

5. Hududlar boshqarmasi (Z.Shodmonov) Xodimlar bilan ishlash boshqarmasi (A.Xasanov) bilan birgalikda:

zaruriyatga ko'ra tuman (shahar) xalq ta'limi bo'limlari xodimlari faoliyati samaradorligini baholash me'zonlariga rioya qilinishini saylanma tarzda o'rganib borish;

yil yakunlari bo'yicha baholash me'zonlari natijalaridan kelib chiqqan holda namuna ko'rsatgan tuman (shahar) xalq ta'limi bo'limlari mudirlarini rag'batlantirish yuzasidan vazirlik rahbariyatiga takliflar kiritish vazifalari yuklatilsin.

6. Devonxona (X.Raximbayeva) ushbu buyruqni bir kunlik muddatda vazirlikning tarkibiy bo'linmalari hamda hududiy xalq ta'limi boshqarmalari, tuman (shahar) xalq ta'limi bo'limlariga qadar yetkazilishini ta'minlasin.

7. Mazkur buyruqning ijrosini nazorat qilish vazirning birinchi o'rinbosari U.Sharifxodjayev zimmasiga yuklatilsin.

Vazir



Sh. Shermatov

Toshkent sh.
2021-yil "25" - fevral,
44 -son